


O LE SULU SAMOA



EKALEZIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

SULU MATI 2012


Faatonu: Cellphone: 7715037 -Main Office: Ph. 24414, Ext 30 - website: www.ccs.org.ws

O LE LENI - O LE ALA I LE SATAURO MA LE ESETA

**Tama'ita'i, o iai lava
sina toe supo o iai
iina ma ta ita?**

(O le tala mo Tupulaga Talavou mo le vai tau faa-Kerisiano ua ta'ua o le Leni).

O le Leni, (Lent) na amata mai i le senituri lona 4. O le vaitaimi e faamanatu ai e le au Kerisiano aso e 40 na faaososoina ai le Alii Faaola i le vao) a o lumana'i lona faasatauroina ma lona maliu. E faaiu le Leni i le Aso Toonai e sosoo ma le Aso Sa o le Toetu. O le vai taimi o anapogi, na o le tasi le 'aiga i le aso, vagana Aso Sa o i totonu o aso ia e 40, ae le taumafa i aano o manu ma le inu i le 'ava malosii. Aua o Aso Sa, e fai ai taumafa ma le fiafia e faamanatu ai le toe tu manumalo mai o lo tatou Alii nai le tuugamau ma le oti. O le (faaauau i itulau mo Tupulaga Talavou, p6)



**Aue! ta ofo...ina ua ia
saili mai - pese 156**

O LE LAUGA

Tusi Faitau: Mataio 8: 23-27

Matua: Mataio 8: 27

“.....Pe se a le uiga o lenei tagata, aua ua usiusitai ia te ia le matagi ma le vai?”

Manatu Autu: Mulimuli MA OFO le ola mo Iesu le tupu o tupu.

Ua iloga le tagata i le ua ia mulimuli ai. A mulimuli i le toa malosi, e avea ma tagata loto tele. Mulimuli i se taitai galue, e fai ma tautua malosi. Mulimuli i le matai lelei, e fai ma auauna faamaoni.

I le isi foi itu, a mulimuli i le tagata leaga, e fai ma tautua leaga. Mulimuli i se taitai leaga, e fai ma afaigaluega le faamaoni. E taua ai le mulimuli tonu i le ua saga tonu lana ta'iala. A sese ala o le ta'imua, ua maumau le ola o e mulimuli. Ua faalagolago foi le ola o e ua mulimuli, e maua lo latou filemu i le taitaiga a le ua fai ma ta'iala.

A ua taua lava foi i le ua ta'imua, le tuu atu atoatoa o le loto ma le ola o e ua mulimuli, o le faailoga o le talitonu, ma le faatuatua e malu lo latou ola i le ua mulimuli i ai.

Ai lava o le ala lea e fetalai ai pea si Alii o Iesu, “.....Mulimuli mai ia te a'u.....”

Ua le o se faatonuga malosi, a o lana valaau alofa ne'i maumau le ola o ona tagata i ala sese ma le inosia, e tau i le faafanoga ma le sala.

E le'i tuufauina e Iesu ona tagata a o feafioa'i si Alii i le lalolagi. Na ia tofofi ma fili e ua ia finagalo ai, na ia a'oa'o ma tapu'e le ola atoa, ina ia avea ma

tagata mulimuli e talitonu ma faatuatua.

A o se Alii foi ina a faapalepale. Se a'oa'o ina a onosai. Se taitai e toafilemu, ma se tupu e agamalu. Aua e faalotolotolua lava lana au mulimuli, e le mautonu pea lana au mulimuli, sa felotoa'i foi ma fia sili lana au mulimuli, ae le'i sii lona leo, e le'i sii sana ta. O ona fofoga filemu, o lona siufofoga malu, na momoli atu ai lana a'oa'i, ma lana a'oa'o. Le aso foi na malaga ai Iesu ma lona au soo i le vaa, ua tofa ai Iesu i le taumuli o le vaa. “Ua tofa Iesu.....” o le faailoga o le moni atoatoa o lona itu tagata.

Ua le lava foi le Alii. Ua 'e'eva lona tino, ua fia maua sona mapu ane teisi. Le ala lea o le tofa o Iesu.

E pei ua ata mai nei, ua tuu atoatoa atu e Iesu lona soifua ma lona saogalemu, i le faautaitaiga e tautai matapalapala o le vai o Kalilaia. Tautai ua masani i le vasa, ua matauina le alavaa ma masani i le feua'iga o matamatagi.

Le ala foi lea e ui ina pa'o ma taalili o le afa ua to mai nei, ua gogolo foi peau ua osofia ai le vaa, tofa filemu lava Iesu. Aisea? Seituu i lana au mulimuli, taatia i lona au soo, fai mai o tautai masani o le vasa.

Talofa, ua gata le atamai faautaitai, ua le gafatia e le malosi taualo, aua ua faafeagai nei le malosi faale-tagata, ma le mamana o galuega a le tupu o tupu.

Ta te le mafai se mea le Ekalesia, pe a le iai Iesu i lou sa. E muta foi sou malamalama ma se taumafai pe a le mulimuli i le Tautai Sili, Iesu le tupu o le ola.

O le itu mata'ina le au uso e, e ui i le taalili ma le gogolo o le matagi, ma peau ua taia ai le vaa, na tofa filemu lava Iesu. A

o le leo o le taualaga, fia sao ma fia maua le ola, na maleifua ai le tupu.

Ua manino lava, e le taofia e le pa'o ma le taalili o faalavelave ma vevesi o le lalolagi, le faafofoga mai a le tupu o le lagi, i lo ta leo tauvalaau.

Lea ua maleifua mai le Tupu o le afa ma le vai ma peau. Le tupu na te vavao le matagi agi tele ma peau fefatia'i. Na te aumai le malu, o le malu tele, e folau ai lana fanau.

Pau a lea o si ana fetalai, “Se a le mea ua outou matata'u ai, outou e faatuatua ititi?” O le fatu lea o finagalo si Alii e toto i loto o ona tagata o le faatuatua. O le fatu e malolosi ma loto tetele ma mafanafana ai. O le fatu e ofoina ai le ola e mulimuli i le tupu silisili.

Fai mai le fesili ina ua ofo lava, “Se a le uiga o lenei tagata, aua ua usiusitai ia te ia le matagi ma le vai?”

O le uiga lea, “O ia o le tupu.” Tupu o le matagi ma le vai. E faalogo mea uma na fai i lona siufofoga pe a fetalai. Le au pele e, avea i tatou ma tagata mulimuli faamaoni e ofoina le ola mo le tupu alofa.

Le tupu e malu ai lo tatou ola. Na te vavao matagi agivale o lutia ai lou finagalo. Na te taofi peau fefatia'i o fesou'ina ai lou agaga. Na te aumai le malu tele lava ta te folau ai ma ta mulimuli ai, tatou te galulue ai. Mulimuli ma ofo le ola mo Iesu le Tupu o tupu, o le na ofoina mai lona soifua mo lana fanau.

Manuia le Ekalesia ma lau galuega molimau. Amene.

Faasalafa F. Alaovae FS.

O loane Uikilifi - le Fetuao o le Toe Fuata'iga (Reformation) c. 1330 - 1384

O le 'Au Lolati (Lollards) Malomaloa

E tele mea na tutupu i tausaga mulimuli e tolu o le soifua o loane Uikilifi. O le tausaga e 1381 na tula'i mai ai se Tetee Tele a tagatanuu o Egelani, na faaautu i tagata faigaluega leipa o le atunuu na latou finauina so latou sa'olotoga. Ua mafatia i le mamafa o lafoga o latou faia, ma tulafono soona fai oloo ua saisaitia ai latou. O le amataga o le taumafanafana i lea tausaga, na solo atu ai le silia i le selau afe tagata ua matua maua i le loto tiga i le laumua o Lonetona, ma alalaga atu latou te fia feiloai i le tupu talavou o Lisati II. Ua faapipii atu nei i lea solo tetee le igoa o Uikilifi, e ui lava oloo iloa e tagata e toatele, e le'i auai Uikilifi i lea solo pe na ia faama'iteina foi. O le taimi lea oloo pisi Uikilifi i le faaliliuina o le Tusi Paia i Latauefi. Peitai na manatu le Ekalesia Katoliko, o talitonuga ma tusitusiga a Uikilifi lea ua mafua ai mea ia ua tulai mai e pei o lenei solo tetee tele.

E talitonu le au faamaumau talafaasolopito, o le tausaga lea e 1381, na a'ea'e tetele mai ai le au Lolati ma avea ai latou o se vaega taua o le atunuu. Sa manatu isi, ae le sa'o lo latou masalosologa, o le au Lolati o tagata e talitonu i a'oa'oga a Uikilifi, ae leai. Ae na mafua ona ta'u ai Uikilifi, ona o Kotenei se faifeau iloga o le Ekalesia Katoliko, ua na faasaina a'oa'oga a Uikilifi ma faasa ta'ita'i o le 'au Lolati i le Iunivesite o Okisefoti ona mulimuli ia Uikilifi.

O le igoa Lolati (Lollard) o lona uiga o le 'au muimui. Mulimuli ane ona faaoga foi lea o lea upu o se igoa faifai i soo se tasi e tetee i aoaoga a le Ekalesia Katoliko.

O nisi o le 'au Lolati a'oa'oina o

nisi oloo mulimuli ia Uikilifi. O le mea moni sa onomea ona ta'u i latou o le 'au Uikilifi. A o i latou e le aoaoina o le 'au Lolati, e le'i iloga mai so latou 'apo'apoina o aoaoga a Uikilifi, ae na auai i le 'au Lolati, ona o le itu tau polokiki - o lo latou inoino ma tetee i faiga saua ma le faapologa tagata a le Ekalesia Katoliko.

O aai sa fai ma nofoaga autu o le 'au Lolati o Okisefoti ma Leisa (Leicester). O le lauiloa o le 'au Lolati i Leisa na oo ina tusa ai o le 50% o tane i Leisa o Lolati.

E faigata ona iloa tonu poo a talitonuga o nei tagata, aua e eseese lava mafuaaga na ala ai ona latou tetee ma auai i le 'au Lolati. Ae o latou lava o tagata lotu sa tetee i le tologiina o le sefulua'i, tetee i le pule a le Ekalesia Katoliko, latou te le talia foi le pule aoa o le pope, tetee i le avea o le uaina ma le areto matino ma toto moni o Jesu Keriso pe a uma ona faapa'iaina e le faifeau (transubstantiation), e le talitonu foi i le valo'ia o le lumanai pe a uma ona feiloa'i atu ia i latou ua maliliu. Atoa ma nisi mea e tele na lisiina e ia tagata e tetee ai i le Ekalesia.

O le tausaga e 1382, na faato'a feagai ai le au Lolati ma se tetee aloa'ia mai pule'aga o le Ekalesia. Sa ta'u ai le igoa o Uikilifi, e ui lava sa mamao lava o ia mai lea mea ua tupu. O le tagata e igoa ia Herefoti, o se sa mulimuli ma lagolagoina talitonuga o Uikilifi, na ia talo se fono a le 'au Lolati i totonu o le Iunivesite o Okisefoti. O lana lauga i le fono na matua lu'itauina ai tagata ina ia lagolagoina ma le malosia ia Uikilifi e tetee atu ai i le pulega a le Ekalesia Katoliko. Na avea lea fono ma auala na vavaeeseina ai, pe faate'a (excommunicated) Herefoti

ma tagata uma sa mulimuli ma talitonu i a'oa'oga a Uikilifi, mai le Ekalesia Katoliko. (Ia manatua mai, o Uikilifi o le patele o le Ekalesia Katoliko).

Ua Luluina le Lalolagi

O le tausaga e 1382 na tele atu mea na tutupu ai i lo le tausaga na muamua. Na fasiotia i le tausaga lava lea le sa avea ma akiepipikopo o Kaneperi, o ia lea o Satepiri (Sadbury), i le taimi o fouvalega a tagata lautele o le atunuu i pulega a le Ekalesia. Ua maua nei le avanoa o le faifeau o Kotenei ona ua tofia o ia e avea ma akiepipikopo fou. O le mea muamua lava na faasaga iai Kotenei ina ua tofia, o le faia lea o fuafuaga e tape ai talitonuga ma tusitusiga a Uikilifi, ma faataape tagata oloo mulimuli ia te ia.

Na talo e Kotenei le fono e faamautu aloa'ia ai le faaleaogaina o talitonuga o Uikilifi. Na auai epikopo e to'a iva ma nisi e to'a tolusefulu ma le ono e iai o latou tikeri o mataupu silisili o le Tusi Paia. Na latou fai sa latou faaiuga e tetee ai i mataupu e 24 o tusitusiga a Uikilifi. O le mea e malie ai, e le'i ta'ua faatasi le igoa o Uikilifi i lea fono, na o ana tusitusiga. Na ta'u seseina e lea fono talitonuga uma o Uikilifi. Na faatonuina foi e Kotenei ia alii leoleo a le tupu ina ia latou tapu'eina le aufailauga ua salalau nei i le tele o le atunuu ma laugaina talitonuga o Uikilifi. Na fai foi le faatonuga a Kotenei ina ia aoina uma mai tusitusiga a Uikilifi, ma o soo se tagata a'oga i le Iunivesite o Okisefoti e maua o mulimuli i talitonuga o Uikilifi, e faate'a ma le Iunivesite e aunoa ma se faamasinoga.

O le naunau o Kotenei e taofiofi se vevesi e ono tula'i mai, o lea na ia le loteina ai lava Uikilifi i nei faasasa ma tulafono. E manatu nisi o talafaasolopito o le Ekalesia, o se

faaanau itulau e sosoo ai

O Ioane Uikilifi - le Fetuao o le Toe Fuata'iga (Reformation) C. 1330 - 1384

tasi mafuaaga o le le loteina o Uikilifi, ona e le taumate o se tuualalo mai ia Koniti, le alo o le tupu, ia Kotenei ina ia 'aue ne' i ona faia se mea ia Uikilifi, ma e le taumate foi na tuuina atu e le alo o le tupu se tupe ia Kotenei, ina ia aua lava ona faia se mea ia Uikilifi. Ona o le akiepipoko lenei e na o tupe ona uiga, e manatu ai nisi, ona pau lea o le mafuaaga na le tulituliaupuina ai Uikilifi e Kotenei. Na fai lea ma mea e to'afilemu ai pea Uikilifi ma saogalemu i Latauefi le nuu oloo ia faaliliuina ai le Tusi Paia.

O le fono lenei na taloina e Kotenei, na faai'u faafuasei ina ua lulu se mafuie tele. Na taufai talitonu itu e lua, o le Atua lea ua a'oa'o mai i le mataupu o vevesi ai. Na manatu Kotenei o le mafuie o le faailoga lea oloo auai mai le Atua i le latou itu. Ae sa talitonu Uikilifi o le mafuie o le faaaliga lea o le finagalo o le Atua, e ta'u atu ai ia Kotenei, e sese faaiuga na latou faia i le latou fono. O lea fono na taloina e Kotenei, na lauiloa mulimuli ane seia oo mai i nei aso, o le Fono o le Mafuie.

Ua amata alia'e tafega o le Toe Fuata'iga (Reformation)

O le tausaga lava lea e 1382, na faaiipo ai le tupu talavou o Egelani o Risati II i le tamaitai o Ane o Bohemia. Na avea lea ma mea e tuu faatasi ai ia atunuu e lua o Egelani ma Bohemia ona o taumafaiga a le masiofo fou o Ane. Ua avanoa ai foi tagata a'oga mai Bohemia e a'oga i le Iunivesite o Okisefoti.

Na ona oo atu lava o tama ma teine a'oga o Bohemia i Okisefoti, amata ona latou suesueina faalilolilo tusitusiga ma talitonuga o Uikilifi. O se tasi o tama a'oga aupito ta'uta'ua

mai Bohemia o ia lea o Jerome o Paraka (Jerome of Prague). O ia lea na ia faasalalauina i Bohemia talitonuga o Uikilifi, ma oo ina tau ane ai se tasi na lauiloa mulimuli ane i le Toe Fuata'iga (Reformation), o le alii lea o Ioane Hasi (John Hus).

E ui lava ua taotaomia nei taumafaiga a Uikilifi i Egelani, a o ana tusitusiga ma a'oa'oga ua mumu faaafi nei lo latou sosolo atu i Bohemia, ma tulai mai ai se isi vaega teteu fou aga'i i pulega a le Ekalesia Katoliko, o le 'au Hasi, poo latou ua mulimuli nei ia Ioane Hasi ma lagolagoina Uikilifi ma faasalalauina atu ia talitonuga se'ia oo mai i le Toe Fuata'iga (Reformation), i le senituri e sefuluono, lea ua lauiloa ai Matini Luteru.

Ua maliu le alii faifeau

O le tausaga e 1382 na tusia ai e Uikilifi lana pepa aupito sili ona ta'uta'ua, o le Trialogue, poo se talanoaga i le va o Mea Moni, Mea Sese, ma Tofa Mamao. O lea talanoaga sa faaaogaina ai talitonuga o Uikilifi ua uma ona faalauiloa. O ana tusitusiga muamua ia na lolomiina e ui lava na te le'i vaai iai, ona e faato'a lolomi i le tausaga e 1525, ma o le pepa lea na fai ma sootaga o Uikilifi ia i latou sa taulamua i le Toe Fuata'iga na tulai mai i le senituri e sefuluono.

O le tausaga lava foi lenei na gasegase ai Uikilifi (stroke) ma oo ina pe ai se vaega o lonaa tino. Sa

taumafai le pope e aami Uikilifi e oo atu i Roma e tali i ona moliaga, ae ua le mafai ona ua gasegase. Na toe maua Uikilifi i le (stroke) a o faalogologo i le misasa i le masina o Tesema 1384, ma oo ai ina le mafai ona tautala. E te'a aso e tolu, ae maliu le alii faifeau, ma foi atu i le mafutaga ma lona Alii sa faamaoni iai.

E ui lava ina faasaga tau atu le Ekalesia Katoliko ia Uikilifi ma ona talitonuga, ae le'i vavaeeseina ai o ia, pe faate'a ma le lotu (excommunicated). O lona falelauasiga e le'i faalauiloa teleina. Ona lagomau atu ai lea o ia i le fanua o le malumalu i Latauefi.

Na faaaauuina e Pevei le uo faamaoni a Uikilifi, le faaliliuina o le Tusi Paia Igilisi (English Bible). O le vaega muamua na mae'a a o lei maliu Uikilifi. O le Tusi Paia lea na faaigoaina e Pevei o le Tusi Paia a Uikilifi e pei ona lauiloa ai e oo mai i nei ona po (The Wycliffe Bible)

E le'i gata i totonu o le Ekalesia aafiaga o talitonuga ma a'oa'oga a Uikilifi, ae na sosolo atu i tagata lautele ma Europa atoa. E leai se vaipanoa e le'i iai ni uo ma soo o Uikilifi. E oo i le tuisolo ta'uta'ua o Egelani, Geoffrey Chaucer, e talitonu tagata o le vaega o le faifeau oloo i le tala *Cnaterbury Tales*, oloo faatatau ia Uikilifi. Oloo tusia atu i lalo i le gagana Peretania na tusia ai lea solo:

A kindly Parson took the journey too.
He was a scholar, learned, wise, and true.
And rich in holiness though poor in gold.
A gentle priest, whenever he was told
That poor folks could not meet their tithes that year,
He paid them up himself; for priests, it's clear
Could be content with little, in God's way.
He lived Christ's Gospel truly every day,
And taught his flock, and preached what
Christ had said.

(faamae'a le tala lenei i le Sulu Samoa o Aperila)

la Moni Uiga o Upu ma Tala

Tusi Faitau: Kolose 4: 2-6

Matua: Kolose 4: 6: Ia le aunoa a outou upu ma le alofa. Ia faamai i le masima. Ia iloa e outou ona fai o se tali i tagata taitoatasi.

Let your speech always be gracious, seasoned with salt, so they may know how you ought to answer everyone.

Manatu Autu:

"IA MONI UIGA O UPU MA TALA."

"MEANING WHAT WE SAY."

E ese le taua o upu. E moni na o se savili. A o le savili e paoa. O le upu e tata tagata. Na te fulifao olaga ma amio. Se faafitauli ua tauga, toetoe a tau - e fofa i upu, to'amalie. Se uo mafana ua masei. Ua masae le laufa'i. E toe teuteu a i upu, toe mamae ma pele. Fai mai upu o le pese palagi - It's only words, and words that all I have, to take your heart away. Fai mai foi le Pese a le EFKS 371 - "Laulau mai pea, ia te i matou, Upu malie e ola ai. Ia fiafia atili ai i upu lelei e ola ai - Upu malie i loto, e mau ai le ola - Upu lelei, Upu malie - Upu malie e ola ai."

O lona - Ia moni upu ma tala - Upu alofa, e mafanafana ai, ma aumai malu i pu'ega. Upu faamalosi'au - E te'a ai le faavaivai. Upu o le a'oa'iga - E tupu ai le pota ma le mafaufau lelei. Upu malu e te'a ese ai le ita. E gau a le sila i le fa'i. Peitai, aua nei galo - E iai foi upu faatupu vevesi. Upu faamanu'a loto. Upu fela'ula'ua'i tala e talepe ai se mafutaga. Upu faafiufiu. Upu o le fetuu - Upu faasaasilu - Upu masoa. Se mau upu.....

O le lagona atoa lea, oloo afifi atu e Paulo i lana tusi leni i Kolose. A o fevaevae'i, ona o tala'iga sese. Ia matua faaeteete le Ekalesia i ana upu, leaga e ma'ale'ale upu. E pala

le maa, ae le pala le tala. Ia tautala sa'o. Ia iai le pota ma le alofa. Ia fetuutuuna'i le mafaufau ina ia tau tonu upu. I le manatu o Paulo - O le power o upu. E maua lea i le tatalo. E faagagaina e le Atua fetalai. E to mai le Atua le matupalapala o moegaluaga faaosofia, e mamana ai lona finagalo. A o tautala ma folafola atu le Ekalesia. Fai mai le fuaiupu e 2: "Ia outou finafinau i le tatalo." Ia tatalo i aso uma ma taimi uma. Aua le tatalo tatalo, moe ifo ai a - Aisea? Leaga e galue le Agaga o le Atua, le Agaga o le pota, le Agaga o measili. E faapefea ona tali mai le Atua pe a moe, pe a faavaivai, pe a manatu mama i le tatalo? Pe a le sau i le Au Leoleo? Fai mai le vaega mulimuli o le f.2: Ia mataala i le tatalo, ia le mapu le faafetai. Aisea? E to'ia loto ma agaga pe a moni upu ma tala. Ae mafua ona moni, o le mataala. E ala foi ona faafetai - se a le tagata ua e manatu mai ai?

Pei oloo manatunatu Paulo i le vaiata tonu leni, poo anapo. Na tatalo toatasi ai Iesu i Ketesemane, po ua atutolu ona asiase ane i ona soo. O le atutolu foi lea ona maua o momoe. Fai mai Iesu: "Ina mataala ia ma tatalo, ina ne'i oo mai le faaososoga." O lona uiga, a aunoa le Kerisiano ma le tatalo, e 'apo'ia gofie e faigata. Aisea? Ua leai se malosi, ua faigofie ona fetosoa'ina e le tiapolo.

Iesu i ona puapuaga. O le malosi faatupu malosi lea na tau ai lau o le faaolataga. O le tatalo. Fai mai le f.3: "Ina tatalo ia mo matou, ma faaavanoa mai e le Atua se faitotoa e tautala atu ai le upu a le Atua sa lilo." E sapenapanea le tatalo. E faaali mealilo. Tatou moomia le tatalo faatasi, tatou te moomia foi le tatalo mai a isi o tatou uso a Kerisiano. Ae faapena foi i tatou. Tatalo mo le manuia o tagata uma e

oo lava i o tatou fili. Fai mai Iesu - Tatalo mo i latou.

Ia Paulo lava ia, e le'i sili ane sona saisaitia i le falepuipui i Roma, nai lona manatu ia nofo lelei le Ekalesia a Iesu. E le'i faapea atu foi, tatalo mai ia 'ou sa'oloto. Leai! O le tatalo ia mana upu e taulogologo atu ai le Tala Lelei i Kolose. Aua o le taulogologo, e tupu ai le faatuatua.

(1) f.4: "Ia ou faailoa atu faapei ona tatau ai." Popolega o Paulo, ne'i le moni upu. Ne'i fefe ma ufiufi upu. Ne'i faagutugutulua pe fia viivii e faamalie ai tagata. Ina ne'i faalata ma le alofa le upu. "Ae ia ou faailoa atu faapei ona tatau ai." Ioe, e faatonutonu folau le mana o talosaga i le galuega folafola atu. E lagona i loto ma agaga ma galulue, faatino ma le gau'i.

(2) f.5: "Ia savavali ma le pota i e oi tua." O le a lona uiga? O e tetee i le Tala Lelei. E le o iai le mana o le upu. Ae na o le faafoliga. Ua tala'i i latou lava, ae le o Keriso. Fai mai Paulo, ia savavali ma le pota. "Aua ne'i faaseseina outou i upu e le o iai le ola. Upu teuteu lumafale. Upu e le fua mai i galuega lelei. Ua na o upu, ae aunoa se faatino.

Ia le avefa'ia foi le vafealoa'i ma ala e suia ai le upu. Fai mai Paulo, savavali ma le pota. A o la Iesu, ia fifilemu pei o lupe ae atamai pei o gata. Aisea? Tautala ma le filemu. Fai mea uma ma le loto maualalo. Ae manatua, 'aua, 'aua lava, ne'i taofia ai le mea moni. Ne'i faataigamalie ma seetia ai, ona see ese lea o le upu moni ma olaga o le Ekalesia.

Vaavaai avanoa tatou te auauna ai faailoa i galuega lelei. Fia taimi e tofia ai e taitai i lotu Au Taumafai, lotu o le Tausaga e lauga pe tatalo, ae faafiti mai, leai se upu, ae le faia - Faafia? Faataigamalie e le faanoi, pisi ma tuatua. Ae a lau auaunaga

faaauau itulau e sosoo ai

ITULAU MO TUPULAGA TALAVOU

faaaau mai le itulau muamua

Tama'ita'i, o iai lava sina toe supo o iai iina ma ta ita?

Leni o le vaitaimi o le toe faamamaina o le Kerisiano, taimi o le salamo mai agasala; taimi o le alofa ma le agalelei i e matitiva; taimi o le toe faafouina o lau tautoga i le Atua; taimi o le suesue ifo i lou tagata ma fesili poo e faamaoni i lou

lua va ma le Atua; taimi o le salamo ma toe foi mai i le Atua ma le mafutaga ma le au Kerisiano; taimi o le papatisoina o tamaiti e foaiina atu i le Atua; o le taimi o le sauniuni atu o le Kerisiano mo le Aso Maliu ma le Eseta, o le aso na faasatauroina ai le Faaola, ma le aso na toe tu manumalo mai ai i le tuuganau ma le oti - le Eseta.)

A o le tala lenei mo le Eseta:

Na ou nofotane lava o lo'u mana'o, ae le'i atoa se 20 o o'u tausaga,

a o lenei ua tete'a le ma aiga fou, alu le tama ae tuu na o a'u ma le fanau laiti e to'alua e tausitoatasi. Na ou manatu lava e alofa moni le tama ia a'u, a o lenei ua alu. O'u moomooga na fai ma sasalu iai o le a manuia ma fiafia iai, a o lenei ua le taunuu.

Ua fai mai nei le pule o le fale lea matou te nonofo ai ma si au fanau laiti, e avatu se \$20 o le totogi o le fale a leai, ona matou

faaaau itulau e soso ai

Ia Moni Uiga o Upu ma Tala

i le Atua? O le tuatuaia numera tasi lea ia faamuamua. Avanoa e faatino ai upu ae le faia, o le tau'ole'ole. Toatele e leai ni atina'e, leai ni Taulaga Au Taumafai, Au Leoleo. Faataligatuli. E le faamalosi, tusa a pe na o le \$10 ae fai. Leai se tino o le tatalo fai moe, fai ma le loto iai. A mataala, e fua mai. Ta'utinoga ina ua faaofia i le Ekalesia, fai ma tiakono, A'oa'o, Faifeau. O le tautoga savili e le ila ai se mea. Le filifiliga, le potopotoga, le tofiga. E moni e pule le tagata faatuatua. Ae le o se pule e faataigamalie ai upu o tautoga ma tautinoga. Fai mai Paulo - ia faaogaina e outou aso o lenei olaga. Faaoga faapefea? Avanoa e auauna ai. Fai loa. Ia moni uiga o upu ma tala. Faaoga tatau aso o lenei olaga.

(3) f.6: "Ia le aunoa a outou upu ma le alofa. Ia faamai i le masima. Ia iloa e outou ona fai faatatau se tali mo tagata uma." Manatua, ia tausaaafia le upu. Pe tautino, pe

pa'opapa, ia malu ave i fale. O le gagana e 'oa, o upu e faamai e le masima. Lausilafia o le masima e le gata ina faatumauina le malaulau o se mea, ae na te tuu iai ma le flavour o le tofo manogi ma lelei. A magalogalo le supo, se miti, ua le manogi i le tausami. Faapena upu. Ia atamai lona tausaaafia. A siisii, ia siisii ina ia lagona. A malu, malu upu o le filemu mo le nofo lelei. Ia tautonu mo se faamoemoe. O le Tala Lelei ta'u atu - ia le faitua'oi pe nei luga o le gagana tausaaafia. Ae ia le tausaaafia ma faataigamalie, ina ia soli faatalitalie. Ma e manatu Paulo, o le moni o upu ma tala - oloo faaaliali matamata tetele mai i le soifuaga atoa o Iesu. A lauga, e tosina mai loto. A faamalolo, e toe fuataina le ola o le tagata. A alofa, e tamaoiga fafo ma totonu o le tagata atoa. A faaola, ua mama ma Javeaina le tagata agasala.

Le vaitau o le Vaiaso Paia. Mai lena Aso Sa o le Malaga Faatupu. Le lotoleagaina ma le fasi

faamo'amo'a, le totoulia ma le manu'anu'a, le faamasinoina ma le faasatauroina. E le'i solomuli le Alii Faaola. Aisea? O le faailoa mai pea lava pea ia te oe ma a'u, ia moni uiga i upu ma tala. Ia paoa le savili ina ua tino mai lona faamaoni. O le uiga atoa lea. Tatou masani, e Aso Maliu a tausaga uma. Ae ala ona faamaratu, ia e 'aulagona ma auiloa. O afea ea e moni ai a tatou tautinoga. O le a se fua o le upu liutino tagata a le Atua? Fai mai Isaia, Ua manu'a o ia ona o a tatou amioleaga. Ua momomo o ia ona o a tatou solitulafono. O ona faalavalava foi, ua malolo ai i tatou.

O le a so ta lagona? E so'ati atu ae faamagalo mai. E fasioti atu ae fai mai - "Ua taunuu" - "Ua fai lenei mo oe."

Ae a ta'ua? Afai o si'o i upu, savali ai nei. 'A faa'ole'ole upu, faamaoni iai nei. Afai o oti le upu, ia ola ai nisi nei.

Faaali mai lou faatuatua i galuega lelei. Pei o Iesu e oti a, i luga o ana upu. AMENE.

Uele Lotu Uele FS.

Vaiala

ITULAU MO TUPULAGA TALAVOU

Tama'ita'i, o iai lava sina toe supo o iai iina ma ta ita?

o ese lea. O le aso lea na ou tootuli ai ma ou tagi, ioe! ma ou tagi i le Atua ma ou vaavaai atu i la'u fanau, o vaavaai mai ia te au, la te le iloa lava se mea o tupu

Ou te le'i faigaluega lava i se galuega e maua ai se masani e fai se galuega ou te ono talosaga iai, aua o lea ou te laitiiti e talavou foi le olaga tau amata. Ae na su'e sa'u galuega ma maua, o le galue i le fale'aiga e aumai mea'ai e manana'o iai tagata, ma ave ipu ma teu laulau pe a ma'o'ona. A o le galuega i le po i se fale'aiga matua pisi lava aua e tumutumu iai tagata.

O le po muamua lava, na alu atu ai se tamaloa 'ele'elea ma palapala ona lavalava ma masaesae fo'i, i le vaega o le fale'aiga o lea ou te vaaia. E tumu le faleaiga i tagata aulelei, lavalava lelei, o alii i o latou suti, ma tamaitai ma o latou sausu manogi ma tautaliga ma vali laumata ma laugutu, ae alu atu iai lenei tamaloa e matua le fetai lava ona foliga ma lavalava ma le mama o lavalava lelei o tagata o tumu ai le fale.

E piipii le lauulu e pei ua tele ni aso e le'i ta'ele. E 'e'ena nifo e pei e le'i pulumuina lava talu ona fanau mai; ma le 'ava ua atili ai lava ona 'auleaga ma oso ai le inoino iai. Na ou manatu pe aisea ua sau ai lava i le faleaiga lenei e tumu i tagata tumama ma

lavalava lelei, ae le alu i se faleaiga e o iai tagata e pei o ia.

Ae ina ua tautala mai ia a'u, na vave lava ona amata ona sui o'u lagona i le tamaloa, ma liu suavai atu ai ma lo'u loto. E foliga faaletonu mai le tamaloa, ae ese le leo malu lea ou te faalogo atu iai. E ese le auleaga ma palapala, ae ese le leo malu. E faaaloalo ma tautala lelei mai.

"Tama'ita'i, faamolemole, ta fia'ai! E iai lava sau supo o iai iina ma ta ita?"

Le aso muamua o le galuega e le'i maua se tupe, a o lenei ua aisi mai le tamaloa i se meaai. Na ou tago atu i le ipu pepa lea e tuu iai a'u tupe e maua mai i tagata taumamafa, ma ou faitauina. E lava tupe o iai e faatau ai se ipu supo lapo'a, ma se ipu kofe, ma se fasipai o le pai lea e lauiloa ai le faleaiga lenei. Ona ou faatauina ai lea o le meaai ma le tamaloa. Ua alu atu nei si fasi tupe laitiiti sa faaputupu mo le tologiina o le fale o matou nonofo ai ma la'u fanau. Na 'ai le tamaloa, ona faafetai mai ai lea ia a'u, alu loa i fafo ma le faleaiga.

O le alofa lea na ou faia i le tamaloa, na matua faasiasia mai ai tagata o taumamafa i le faleaiga, faapea ma isi tagata faigaluega o le faleaiga ia a'u, e oo lava foi i le pule ua ia otegiaina au ma fai mai e 'aia ou te toe faia le mea lea. Fai mai a ia e le faamasaniina e le faleaiga ni tagata palapala ma lavalava leaga faapea.

Na ou tagi i le faasiasia mai o tagata, ma otegia foi au e le pule i luma o lenei anoano o tagata.

ma ou tau memumemu atu ai i le pule: "Ou te le iloa pe ua iai se isi o outou ua fia'ai e pei o le tamaloa, ae ua ou oo i le fia'ai. Ua ou oo i le leai o sa'u tupe e faatau ai se meaai ma a'u ma la'u fanau laiti. Ua ou oo iai. Ma le isi, oloo fai mai le Tusi Paia, ia e alofa atu i le tagata ese, ma le tagata mativa."

Ae talie 'a'amu tagata i la'u tala. Ae na solo o'u loimata ma ou savali atu ua faaauau ona fai o la'u galuega o le aoina o ipu i laulau a i latou ua ma'o'ona.

Ae te'i ua ulufale atu se isi tamaloa, e ofu lelei, aulelei, mata 'ata'ata. Na vaavaai toto'a atu o ia ia i matou uma lea e vaaia laulau a tagata o taumamafa, e pei o su'e se isi, ona nofo ifo ai lea i le nofoa oi le laulau lea e la'u atu ai a'u ipu meaai mo tagata taumamafa, le nofoa lava foi lea na nofo ai le tamaloa palapala ma ofu masaesae lea faato'a alu atu i fafo.

Na ta'u mai ia a'u le igoa o le isi teine faigaluega i le galuega lava lea ou te galue ai, ma fesili mai poo faigaluega i le po lea. Na ou alu ma ou fesili i le pule, ae fai mai ua le o toe faigaluega le teine lea e mana'o iai le tamaloa, ma e leai foi se isi na te iloa le mea e nofo ai.

Ona faamatala mai ai lea e le tamaloa o le tala lenei ia a'u:

"O se isi po, pe tusa o le tausaga atoa ua te'a, na oso ai i le autu la'u taavale ma ou manu'a ai. Ona ou sau ai lea i le fale'aiga lenei ua o'u palapala uma ma tafetoto lo'u tino i o'u manu'a. E leai m. se isi na ano mai ia te a'u, ona na manatu uma lava tagata na matou fufusu ma nisi. Ae sa iai lava le isi teine faigaluega lea, na alofa mai ia a'u, ma alu ua vili lo'u aiga, ma le taavale e sau e toso atu la'u

faaauau itulau e sosoo ai

A Page for Youth

ITULAU MO TUPULAGA TALAVOU

Tama'ita'i, o iai lava sina toe supo o iai iina ma ta ita?

taavale. Sa niniva lo'u ulu ma ou le mautonu foi i lea po ma galo ai ia a'u ona tuu se tupe ma le teine e tusa o lona alofa ia a'u. E matua mamao lava le aai ou te sau ai, a o lenei ua ou toe oo mai iinei, ma ou manatua le mea na fai e le teine mo au. Ua ou manatua ai e le'i tuuina iai se

tupe mo si teine."

Na nofo le tamaloa ma ona foliga faanoanoa. Ae te'i ua 'ata'ata ma vaai mai ia a'u ma fai mai, "E te iloa, ave la le tupe na ou fuafua e tuu ma le teine, ma oe."

Na tago mai ma tuu mai i lo'u lima se tupe pepa, ma savali loa i fafo e aunoa ma se isi tala. Ae le'i iai se taimi ou te vaai ai i le tupe ma ou faafetai ai foi i le mea ua ia fai.

Ou te vaai ifo i le tupe i lo'u lima, o le tali lea o la'u tagi i le

Atua ina ia alofa mai ma fesoasoani mai i le totogi o le fale oloo matou nonofo ai ma la'u fanau. \$20!

Ona ou manatu ai lea, ma ou matua talitonu i lea aso, o le tamaloa lavalava palapala ma foliga auleaga ma le le ta'ele, faapea foi ma le tamaloa aulelei, lavalava lelei ma le mata 'ata'ata, o agelu. O agelu na 'auina mai e le Atua, ua 'o'ofu mai i la'ei e lalafi ai ina ia ou le mate'iaina o la'ua o agelu. O agelu na auina mai e le Atua, e tofotofoina le faatuatua o lo'u teine talavou ua puapuagatia ona o la'u filifiliga na fai a ua le manuia ina ua tia'i a'u ma la'u fanau e lo'u to'alua.

*faamatalaina e Afemata
Tunumafono Apelu Aiavao*

One Solitary Life

He was born in an obscure village, the child of a peasant woman. He grew up in still another village, where he worked in a carpenter shop until he was thirty. Then for three years he was an itinerant preacher.

He never wrote a book. He never held an office. He never had a family or owned a house. He didn't go to college. He

never traveled 200 miles from the place where he was born. He did none of these things one usually associates with greatness. He had no credentials but himself. He was only 33 when public opinion turned against him. His friends ran away. He was turned over to his enemies and went through the mockery of a trial. He was nailed to a cross between two thieves.

When he was dying, his executioners gambled for his clothing, the only property he had on

earth. When he was dead, he was laid in a borrowed grave through the pity of a friend. Twenty centuries have come and gone, and today he is the central figure of the human race, the leader of mankind's progress.

All the armies that ever marched, all the navies that ever sailed, all the parliaments that ever sat, all the kings that ever reigned, put together, have not affected the life of man on earth as much as that One Solitary Life - Jesus! *Author Unknown*

Afisi e le Leoleo Mamoe

(Tala mo le vai taimi o le Leni
(Lent) aga'i atu i le Eseta)

Na susulu mai le malamalama o le la i totonu o le falesa, e ala atu i faamalama felanulanua'i. E tofu le faamalama ma se ata o se vaega o le soifuaga o Iesu. Sa tosina lava iai i faamalama ia lo'u mafaufau a o lo'u laifiti.

E masani lava ona alu atu la ma

taavale ma lo'u tama ona tuu lea o a'u i le falesa i taeao o Aso Sa ona alu ai lea i lana galuega, a toe fo'i mai ona ma toe o foi lea i lo matou aiga. Ou te nofonofo ai lava i le faapaologa o le falesa, ma ou faalogologo i lauga o lotu, o lauga e tele lava ina ou le malamalama ai. O le ala lea ou te nofonofo ai ma ou matamata i ata felanulanua'i oi faamalama. Se'ia oo ina ta le piano e iloa ai o le a fai le pese mulimuli ma tuua ai le lotu. E taape loa

tagata, ona ou savali atu lea ua ou matamata i le faamalama e aupito sili ona ou fiafia iai. Ou te 'a'e i luga o se nofoa maualuga, ei lalo tonu lava o le faamalama, ina ia ou latalata ai i le ata o Iesu oloo tu i totonu o le vao o se fanua ma oloo si'osi'oina o ia e mamoe.

O se isi taeao na fesou'iina ai lava lo'u mafaufau ma o'u lagona. Na ou 'a'apa atu i luga ma pa'i atu i vae o Iesu. E lamolemole le tioata ma mafanafana. Na ou vaai atu a oloo faataupupula mai foi le Alii ia a'u, ma tau mai lana vaai i

faaauau itulau e sosoo ai

Afisi e le Leoleo Mamoe

lo'u loto faaletonu Na ou mana'o ai lava se'i sii ia o a'u e le Alii ma faafuata ma tu i totonu o le faataali'oli'o o mamoe i ona tafatafa. E pei lava ua ou miti ua ou ta'oto i 'a'ao o le Alii ma ou aluga atu i lona tau'au ma ou moe ai, i le mafanafana o lona tino.

Na ou te'i mai i la'u matamataga e pei o se miti ma ou manatua ai ua toeitiiti taunuu lo'u tama ma ma o loa i lo matou fale. Ona ou faavava atu ai lea i nofoa o le falesa ma oo atu i le faitotoa tele ma 'ou tatalaina ae ou alu i fafo.

Peitai, o lenei ua tele tausaga ua te'a, ua ou matua foi, ae a ou manatua nei taimi sa masani ona ou nofonofo ai i lalo o le faamalama tioata felanulanua'i i le falesa, ma ou matamata ia lesu, o le ata e oso mai i lo'u mafaufau, o lesu oloo tu i totonu o se fanua oloo tumu i mamoe, a oloo ia siiina o a'u ma faafuata, ae le o

se mamoe. E pei ua vanevaneina i lo'u mafaufau le ata oloo i le faamalama tioata, ae ua sui le mamoe oloo iai, a o a'u oloo siiina e lesu ma faafuata a o o'u laitiiti lava, na o le lima o o'u tausaga.

E le'i umi ni tausaga ae sii atu lo matou aiga i se isi aai tele ma matou nonofo ai, ae ou te manatua mai lava le faamalama lenei i le falesa.

Na oo ina matou toe fo'i mai i le aai lea e iai le falesa lea ina ua te'a tausaga e 30. Na ma tafafao ma sa'u uo i le falesa ma ma matamata ai, aemaise lava i ona faamalama. Na ou faamatalaina i la'u uo le faamalama lea, ma le le mafai ona galo ia te au le ata o lesu oloo ia siiina le mamoe, o le ata lea sa fesoasoani mai ia te au i taimi na oo mai ai faigata i lo'u olaga, ma tofotofoina ai foi lo'u tagata. Ina ua toe oo atu i le falesa ma ou tatalaina, na ou toe manatua taimi na ou

alu ai i le falesa a o o'u laitiiti, ma ou ofo pe na faapefea ona ou tatalaina lenei faitotoa tele ma le mamafa, aua e na'o le lima ou tausaga i le taimi lea.

Na ma matamata mai lea faamalama i lea faamalama, se'ia oo lava ina ma taunuu atu i le faamalama lea e sili ona ou fiafia iai. Oloo iai lava lesu! Oloo tu ai lava lesu i le fanua, ma afisi le mamoe, a oloo si'osi'oina o ia e le anoano o mamoe. I nei tausaga e 30, sa ou manatua ai lava, le ata lava lea, ae o le tamaitiiti oloo siiina e lesu, ae le o se mamoe. O lenei ua ou toe vaai lelei iai, o le mamoe lea e sii, ae le o se tamaitiiti.

Na ou faamatalaina i la'u uo le mamoe ma le tamaitiiti, ae fai mai la'u uo. "O lou naunau ma moomoo ina ia afisiina oe e lesu a o e laitiiti, o le mea lena na sui ai i lou mafaufau le ata, ua le o le mamoe, a o oe oloo afisi e le Alii.

Na ou talitonu ai, o a'u lava lea na afisiina e le Alii i nei tausaga e tele ua mavae, i taimi o fesou'iina lo'u olaga i faafitauli e tele. Sa ia tausi ia te au, ma faalatalata mai ia te au i taimi o o'u vaivaiga.

O lanu o le vaitaimi o le Leni (Lent)

I le tele o Ekalesia Kerisiano, o lanu o le Aso Maliu, poo le Aso Faraile a o le'i oo i le Eseta, sosoo ai ma le Aso Toonai, o le uliuli. Ona pau lea o aso o le kalena faa-kerisiano e faaoga ai le lanu uliuli. O le lanu e faailoa ai le pogisa o le lalolagi ina ua oo mai iai le agasala. O le faailoga foi o le oti, e le gata i le maliu o Keriso, a o le lalolagi atoa mai le agasala. O le lanu

uliuli, o le lanu foi lea e tele ina tatou faaaogaina i se maliu e faailoa ai lo tatou faanoanoa, ma le maliu ua oo mai. O le lanu foi e faailoa ai le toilalo o le lalolagi i le agasala pe a le iai le Atua. Peitai, o le taeao o le Aso Sa o le Eseta, e suia ai le lanu uliuli lea o le agasala ma le faasalaga, i le lanu pa'epa'e o le fiafia ua toe tu manumalo mai le oti ma le tuugamau lo tatou Alii Faaola. O lo tatou manumalo foi lea pe a tatou salamo ia tatou agasala ma tatou talia le taulaga pa'ia na osi e lo tatou Faaola i lona tagata. O le ala foi lea e tele lava ina tatou la'ei papa'e ai ia tatou sauniga i Aso Sa, ona o le faaaliga lea o lo tatou fiafia, ua toe tu lo tatou Alii. Aua ia

manatua, o le Aso Sa, soo se Aso Sa, o le aso na toe tu mai ai le Alii Faaola.

O lanu e masani lava ona faaoga i le tele o maota tapuai i le vai taimi atoa o le Leni, o le paauli (purple), mumu viole, ma le viole paauli. O lanu e faailoa ai tiga ma puapuaga o le Alii Faaola i taimi o lona faasatauroina ma lona maliu. A o le paauli o le lanu foi o aiga tupu, e faailoa ai o puapuga ma le sala ulua na faaee ia Keriso, o le ala lea na taunuu atu ai i lona toetu ma lona manumalo i le oti ma le tuugamau, lea tatou te samiina i le taeao o le Aso Sa o le Eseta,

FAASOLOGA FONO TELE 2012

MALUA, ASO 14 - 25 ME

*"Fetalai mai ia, le Alii, aua o lo'o faalogologo atu lau auauna"
('Speak Lord, for your servant is listening.' | Samuelu 3:9)*

<u>ASO</u>	<u>TAIMI</u>	<u>KOMITI & SAUNIGA</u>	<u>NOFOAGA</u>
ASO GAFUA 14/05/12	10.00am 1.00pm 7.00pm	Komiti Faatonu Komiti o Atiina'e Lotu Talosaga Au Toeaina <i>Ta'ita'i: Tavita Taulealo FT</i>	Fale Iupeli Fale Senetenari Fale Iupeli <i>Manukau</i>
ASO LUA 15/05/12	8.00am 9.00am 7.00pm	Komiti Au Toeaina Komiti o Aoga Faletua Au Toeaina Komiti Faamisionare	Fale Iupeli Fale Senetenari Fale o Tina Fale Mafutaga
ASO LULU 16/05/12	8.00am 9.00am 2.00pm 7.00pm	Komiti o Feau Eseese Komiti Au Taumafai TPT: Iautua Puapuaga o 'Iagata Komiti o Feau Eseese Lotu Au Taumafai <i>Ta'ita'i: Timoteo Momoemausu FS</i>	Fale Senetenari Fale Mafutaga Fale o Tina Fale Mafutaga Fale Iupeli <i>Lotofaga-Lepa-Aleipata</i>
ASO TOFI 17/05/12	8.00am 9.00am 1.30pm 3.00pm 7.00pm	Komiti o Tupe Komiti Au Leoleo Lotu Mafutaga Tina TPT: Teine Papauta Tuai Fono Mafutaga Tina Lotu o Nuu Ese <i>Ta'ua'i: Kolia Fiu Kolia FS</i>	Fale Senetenari Fale Mafutaga Fale o Tina Fale o Tina Fale o Tina Fale Iupeli <i>Niusaelese</i>
ASO FARAILE 18/05/12	5.00am 9.00am 2.00pm 7.00pm	Lotu Au Leoleo <i>Taitai: Serulo Lago'o FT</i> Fono Mafutaga Tina Komiti o Tupe Komiti o Tupe Fono Malua Tuai	Fale Iupeli <i>Amerika</i> Fale o Tina Fale Mafutaga Fale Senetenari Fale Senetenari
ASO TOONAI 19/05/12	9.00am 2.00pm 7.00pm	SAUNIGA O LE FAAUUGA <i>Taitai: Apelu Lelevaga FT</i> <i>Faitau Tusi Paia: Alimau Manu FT</i> <i>Tatalo: Kerita Reupena FT</i> <i>Tu'uina o A'oa'o mo le Faauuga:</i> <i>Tautiaga Senara FT -</i> <i>Faaaelima: Apelu Lelevaga FT</i> <i>Peleti Toailoa FT</i> <i>Liki Tiatia FT</i> <i>Iosia Evile FT</i> <i>Tavita Roma FT</i> <i>Lauina Vui FT</i>	Fale Iupeli <i>Malua</i> <i>Faasaleleaga</i> <i>Kuiniselani</i> <i>Aana</i> <i>Malua</i> <i>Niusaelese</i> <i>Amerika</i> <i>Hawaii</i> <i>Faasaleleaga</i> <i>Apia i Sasa'e</i>
	2.00pm	Lotu Tupulaga <i>Taitai: Auatama Esera FS</i>	Fale Iupeli <i>(Faasaleleaga)</i>
	7.00pm	TUFA FAILA A USUFONO	Fale Fono

ASO SA	9.00am	LOTU TAEAO/FAAMANATUGA	Fale Iupeli
20/05/12		(<i>Taitai: Peleti Toailoa FT</i>)	(<i>Niusaelese</i>)
		LOTU TAEAO/FAAMANATUGA	Fale o Tina
		(<i>Taitai: Tunumoso S. Iosia FT</i>)	(<i>Falealilii i Sisifo</i>)
	6.00pm	LOTU AFIAFI	Fale Iupeli
		(<i>Taitai: Milo Faaleava FS</i>)	(<i>Aukilani</i>)
		LOTU AFIAFI	Fale o Tina
		(<i>Taitai: Malo Tanielu FS</i>)	(<i>Ituotane</i>)

21 - 25, USUIA LE FONOTELE

ASO GAFUA	7.45am	Tapuaiga Amata	
21/05/12		<i>Taitai: Lale Ieremia FT</i> -	<i>Taitaifono</i>
	10.00am	Pepa: Faalepo Tuisuga - Kolisi Faafaifeau i Malua	
	11.00am	Taualumaga o le Fono Tele.	
	12.00pm	Malologa mo Taumafataga o le Aoauli.	
	2.30pm	Fa'aaauu Taualumaga o le Fono.	
	5.30pm	Malolo le Fono	
	7.00pm	Pesepesega Faaleagaga - Autalavou Mtg Apia.	
ASO LUA	7.45am	Tapuaiga Amata	
22/05/12		<i>Taitai: Esekielu S. Tanielu FT</i>	(<i>Penisione</i>)
	8.00am	Pepa: Peleti Toailoa FT	(<i>Au Toaina</i>)
	9.00am	Taualumaga o le Fono Tele.	
	12.00pm	Malologa mo Taumafataga o le aoauli.	
	2.30pm	Fa'aaauu Taualumaga o le Fono	
	5.00pm	Malolo le Fono	
	7.00pm	Faalauloia - Pulega Fela'uaiga i le Lauelele (LTA).	
ASO LULU	7.45am	Sauniga Faamanatuina 50 Tausaga EFKS	
23/05/12		SAUNIGA ALOAIA MO FAIFEAU PENISIONE	
		<i>Taitai: Lale Ieremia FT</i>	
	2.30pm	Amata taualumaga o le Fono	
	5.00pm	Malolo le Fono	
	7.00pm	Pepa: Fale Andrew Lesa (Youth Leader)	
ASO TOFI	7.45am	Tapuaiga Amata	
24/05/12		<i>Taitai: Alaovae Alaovae FT</i>	(<i>Penisione</i>)
	8.00am	Pepa: Muliaumasealii Metusela Tesimale TK	(<i>Vitoria</i>)
	9.00am	Amata Taualumaga o le Fono Tele	
	12.00pm	Malolo mo Taumafataga o le aoauli	
	2.30pm	Fa'aaauu taualumaga o le Fono	
	5.00pm	Malolo le Fono	
	7.00pm	Feiloaiga Au Toaina & Aufaigaluega Faifeau.	
ASO FARAILE	7.45am	Tapuaiga Amata	
25/05/12		<i>Taitai: Lale Ieremia FT</i>	(<i>Ta'ua'ifono</i>)
	8.00am	Pepa: Matagaluega Apia.	<i>Au Talavou</i>
	9.00am	Amata Taualumaga o le Fono Tele.	

TAUALUMAGA O LE FAASOLOGA O LE FONOTELE:

- 1 Faamaonia Iugafono Fono Tele 2011.
- 2 Mau Tu'u Sa'o mai Matagaluega.
- 3 Mau Tu'u Sa'o mai Komiti Tetele e Ono a le Ekalesia:
- 5 Faamaonia Galuega a Komiti.
 - i. Komiti o Tupe
 - ii. Komiti o Feau Eseese
 - iii. Komiti o A'oga
 - iv. Komiti o Atiinae

- v. Komiti Faamisionare
vi. Komiti Au Toeaina.

6. Palota Sui Taitaifono.
7. Palota Failautusi Aoao.

FAILAUTUSIAOAO

Le Alii e, ia faamanaina i matou mo le galuega lavea'i

(O le pepa na fofogaina e le pule o le Kolisi i Malua, Rev. Dr Otele Perelini, i le Fono Tele i Malua 2008)

O le Atua e ona le mana uma lava, o ia foi e toatasi e ona le galuega lavea'i a o i tatou o ana mea faigaluega mo le faataunuaina o lea galuega lavea'i.

O le tala i le faatusa o Iesu i se tasi o falesa tele i Egelani, oloo faaalai ai le Alii ma ona aao oloo faamafola atu ma upu oloo tusia ai i lalo: "Ia outou o mai ia te a'u outou uma o e tigaina ma mafatia i avega, o a'u e malolo ai outou." Peitai ina ua faaleagaina lenei falesa i ni pomu mai vaalele Siamani i le taua lona lua o le lalolagi, e faapea le tala na faaleagaina ai foi ma lenei faatusa o le Alii. Ua motusia ona aao ma ua le toe iai ai ni ona lima o toe faamafola atu. Ina ua uma le taua, sa taumafai loa tagata o le aai e toe faaleleia le falesa faapea ai ma le faatusa o Iesu. Ae peitai e lei faogofie ona toe faapipii aao o le Alii ona o maa mole tonu na faia ai ua le o toe maua. O lea ua manatu ai loa e na toe faafouina le falesa, ia tuu pea ia le faatusa o le Alii i le tufaga faaleagaina ua iai ma le leai o ni ona aao, ae peitai ia suia loa upu oloo tusia ai i lalo o le faatusa i upu nei: "Ia avega ou lima ma o'u lima ma aao lavea'i o le Alii i le lalolagi."

Ua tala feagai foi lenei mafauaoga ma se tasi o fuaiupu o le pese ua faa-Samoaina i la tatou tusi pese: **Ave ou lima ia fai ai; Mea e aoga ia te oe. Ave ou vae ia aoga; E femoei i au feau.**

O le foafoaga mai le amataga na faia ai le tagata i le faatusa o le Atua. O le manatu maualuga ia avega le tagata ma foliga vaaia o le Atua i le lalolagi. O ia na te faataunuaina le finagalo o le Atua i lana foafoaga. O ia o le tausi mea a le Atua ma

lana mea faigaluega mo lana lalolagi. O ia na te faatino fuafuaga uma a le Atua mo lana foafoaga, aemaise ai le galulue soosoo tau'au ma le Atua e faaauaina lana foafoaga lelei ma le atoatoa i le lalolagi. E ui la ina leaga le tagata, peitai e lei faaumatia ai fuafuaga paia a le Atua aua lana foafoaga ma ona tagata. O le finagalo lea o le Atua i lona valaauina o Isaraelu e avega ma ona nuu. Ia avega i latou ma mea faigaluega a le Atua, e faaoo atu ai lana faaolataga i tagata uma.

E lei valaauina Isaraelu ina ia taofia manuia o le Atua na o i latou, ae o le finagalo o le Atua, ia amata atu i Ierusalem ona faasosolo atu lana faaolataga seia oo i tuluiga o le lalolagi. E le o le manatu lea sa ia Isaraelu. Ua fa te i latou, o lo latou valaauina e avega ma nuu filifilia, o lo latou matu palapala faapitoa lea, e le mafai ona faasafua ae o le tofi ua na o i latou mai le Atua. I le tala faasolopito la o le nuu o le Atua, oloo lauuluga ai lea manatu, o Isaraelu o le pele a le Atua ma o lona valaauina ua faaesea mai ai i latou mai nisi o nuu o le lalolagi. Ua avega lea ituaiga talitonuga ma mafuaaga ua manatu ai ua na o i latou lava le Atua, ma o faamanuiaga uma foi a le Atua, ua faapitoa lava na o i latou. Peitai i tusitusiga ma aoga a le au perofeta, oloo faamamafaina ai le taua o le avega o Isaraelu ma malamalama a le Atua e faasusulu atu ai lana faaolataga i le lalolagi.

O le valaauina o Isaraelu e avega ma nuu o le Atua, o le valaauina lava lea e avega ma auauna ma mea faigaluega a le Atua e molimoli lona finagalo i nuu uma, ina ia mafai ona faaolaina ma laveaiina ai tagata uma. O le Atua e ona le mana e mafai ai e Isaraelu ona faataunu lona valaauina e avega ma mea faigaluega a le Atua i nuu

ese. O le talitonuga lea oloo i tusitusiga o le Feagaiga Tuai. E le o ia Isaraelu se malos, e le o i ona tupu ma ona taitai, e le o i ona perofeta, e le o i ona tagata se malos, ae o le Atua e mafai ai e Isaraelu ona faia lana galuega o le faaolaina ma le laveaiina o le lalolagi. O le Atua lea, ua iloga i mea na ia faia i le tala faasolopito o Isaraelu, ma o ia e toatasi ua mafai ai e Isaraelu ona ati a'e lona malo ma lana tapuaiga i le vai taimi o le vevesi ma le tau faamata'u o malo oloo latou tuaoi. E ui foi ina toilalo ma ave faatagata o tauaina le nuu o le Atua, ae lei mate ai le faamoemoe o le Atua mo Isaraelu, i le toe faafoisia ma le toe tuu faatasia o ona tagata. O le valoaga i le afio mai o le Mesia ma le toe faafouina o le feagaiga a le Atua ma lona nuu filifilia, e le o se faamoemoe ua na o Isaraelu ae ua aafia ai le lalolagi atoa. O le faamoemoe ua faamautuina atili ai le finagalo o le Atua aua lana faaolataga mo le lalolagi atoa.

O le afio mai o Iesu Keriso, o le faataunuina lava lea o le galuega lavea'i a le Atua ua leva ona afuafua mai talu le amataga. O lona afio mai, ua le na o le nuu o le Atua ae ua aafia ai le lalolagi atoa. O lona maluu ma lona toe soifua manumalo mai le oti ma le tuugamau, o le faamausaliina lea o le galuega lavea'i a le Atua na amata mai i le foafoaina o le tagata i ona foliga paia faapea lona valaauina o Isaraelu e fai ma ona nuu.

O le valaauina ma le auina atu o ona soo e fai nuu uma ma soo ma papatiso atu i le suafa o le Tama ma le Atalii ma le Agaga Paia, o le faaauaina lea o le galuega lavea'i a le Atua mo le lalolagi. O le auina ifo o lona Agaga i le Aso Penetekoso, o le faapaiaina ma le faaaupegaina lava lea o lana fanau faatuatua mo lea lava galuega lavea'i. O le Atua na te faapaiaina, na te faaaupegaina ma faamalosi lana Ekalesia ma ona tagata mo lea galuega lavea'i.

O le Ekalesia o le tino o Keriso i le lalolagi. O Iesu Keriso o ia lava o le Ao o le Ekalesia, ae o i tatou lana Ekalesia o ona lima ma ona vae ma lona tino i le lalolagi. Ua ia tuuina mai ia te oe le Ekalesia lana galuega lavea'i tatou te faaauaina. I le tala faasolopito la o le galuega lavea'i a le Atua i le lalolagi, oloo ua ogatotonu ai le liutino tagata o le Atua e ala i lona Alo o Iesu Keriso ma lana galuega faaola. O lona maluu ma lona toe soifua manumalo mai le oti ma le tuugamau ua avega ma totonugalemu o le alefa ma le omeka a le Atua ma lana

faaauu itulau e soosoo ai

Le Alii e, ia faamanaina i matou.....

galuega faaola. Ua faigofie nei ona malamalama le tala faasolopito o le faaolataga a le Atua mai le amataga e agai atu i lona faaatoatoaina i le lumana'i, ona o le afio mai o lo tatou alii o Iesu.

O le vai taimi nei o le vai taimi o le Ekalesia ma e faatuatua. O le faaauauina o lenei galuega lavea'i a le Atua ua i aao ma lima lea o le Ekalesia na te faataunuuna. Ae o le fesili: O le a lea galuega lavea'i? Oloo molimau le Tusi Paia, i le lautele o le galuega faaola a le Atua. O lea galuega lavea'i, e le faapitoa na o le ola faaleagaga ma le soifua tapua'i o le tagata, ae o le tagata atoa ma lona siosiomaga ia faaleleia ma faaolaina.

O le faaolaina o le ola faaleagaga, e taitaiina ai le tagata galue mo le faaolaina ma le faaleleina o le lalolagi ma le foafoaga a le Atua. E tele vaega o lenei galuega lavea'i oloo taua i le Tusi Paia. Ae o sina taiala mo tatou mafaufauga i le amataga o lenei Fono Tele a le Ekalesia, ua tuuina atu ai nai manatu mo lo tatou soalaupuleina.

i) O le laveaiina mai le nofo pologa ma le sauaina. I le tala faasolopito o le nuu o le Atua, oloo matauina ai aao lavea'i o le Atua i lona nuu mai le tele o sauaga ma le faapologaina o Isaraelu e isi malosi. Mai lava ia Aikupito ma le Esoto seia oo lava ina faatuina le malo o Isaraelu, oloo molimauina ai aao lavea'i o le Atua i ona tagata. I le faatafeaina seia oo ina toe faafosisia le tafeaga, oloo faaalua ai aao agalelei o le Atua i lona nuu. E le finagalo le Atua ina ia nofo pologa lana fanau ma taotaomia ae ao ina ola saoloto le tagata mai le fefe ma le sauaina, e le gata i o latou tino, ae faapea foi le sauaina o le mafaufau faapea o latou agaga.

ii) O le faasaolotoina o le tapuaiga mai talionuga faapaupau ma atua ese. O se galuega tele lea na feagai ma perofeta a o fetosoaiina le ola tapuai ma le soifua faatuatua o le nuu o le Atua i le tele o tapuaiga ma talionuga o nuu ese latou te tuaoi. O le faatuuina o le talionuga i le Atua e toatasi mai le tele o le faatosina o atua eseese o isi nuu ma malo, e le o se galuega faigofie lea. Peitai, e tumau pea le talionuga, o le manuia ma le solosolo manuia o le fanau a le Atua e faalagolago lea i lo latou tumau i le Atua e toatasi, peitai, o puapuaga e oo ia i latou, e mafua lea ona ua latou tuua lo latou Atua moni ae

liliu atu i atua ese.

iii) O le laveaiina o tu ma aga faale-Atua mai tu ma aga faapaupau. O tapuaiga ese e o faatasi ma a latou tu ma aga faapaupau. O le faitaaga, o le faamaligi toto, o taulaga tagata osia, o taulaitu ma tupua vavafo, o onaga ma poula, o tu ma aga mataga, o nisi ia o aga e faatagaina i tapuaiga faapaupau ua aafia ai olaga o le nuu o le Atua. O nei aganuu, ua tele ina faapologaina ma aveesea ai saolotoga ma aia tatau a tagata ma oo ai ina le saogalemu ma le fiafia le olaga o le tagata i aso taitasi.

iv) O le pule saua ma le ola tau faamatau o tupu ma tagata malolosi. O le tulafono lea faale-vaomatua na soifua ma ola ai le tele o malo ma tagata i le vai taimi o le Feagaiga Tuai. O le malosi lava na pulea ai le soifua ma le ola o tagata. O e malolosi ua latou faia tulafono ina ia manuia ai lava i latou, ae o si vaivai e leai sona leo i le faafoeina o lona soifua. O tulaga faapenei e masani ona faapologaina ai e le ua malosi le ua vaivai, e faoa ai e le ua tele ana mea nai mea itiiti a le ua le tagolima, e pule soona fai ai le ua iai le pule ia te i latou oloo nofo pologa. O perofeta moni a le Atua, o i latou ia sa fai ma leoleo aemaise o le ave ma fofoga o le Atua e molimoli ai se feau aua le faasaolotoina ma le faaolaina o le ua vaivai ma ua faapologaina.

v) O le laveaiina mai i oge, o la mala, o afa ma mafuie, o lologa ma le malosi o le natura. A oo mai le malosi o le natura e faaleagaina ai le soifua manuia o tagata, o e lava e muamua ona matua afaina, o atunuu vaivai ma le matitiva, o e vaivai o se sosaiete e iai nai fanau iti ma matua oti, o tina ua nofo toatasi ona ua maliliu a latou tane, o e matitiva ma le tagolima, faatasi ai ma e mama'i ma le tagata na te tausia ma puipua ma le faaeteete ina soifua manuia ma ola lelei le tagata ma meaola o le foafoaga.

vi) O le galuega faaola a lo tatou Alii o Iesu oloo faatauina ai le ola soifua maloloina o le tagata atoa. O ana galuega faamalolo oloo aafia ai ituaiga gasegase eseese, o le pipili, o le tauaso, o le ma'i vevela, o le ma'i lili, o le ma'i lepela, o le ulutinoina e agaga leaga, ma isi mau ma'i seia oo lava i le maluu ma le oti na faatuina e lo tatou Alii. O le 1/3 o galuega a lo

tatou Alii e pei ona taua e le au faievagelia o le faamaloloina lea o ma'i eseese. E eseese mafuaaga o gasegase na faamaloloina e Iesu, ma o auala foi na faaagaina e lo tatou Alii e o gatasi lava ma mafuaga o lea gasegase ma lea gasegase.

vii) O le faasaolotoina o tamaitai ma fanau laiti mai le tele o sauaga aemaise o tu ma aganuu oloo saisaitia ai lo latou saolotoga ma aveai ai i latou ma e e maualalo tele lo latou tulaga i totonu o le lotu ma le sosaiete lautele. I le Feaiga Tuai ma le Feagaiga Fou oloo faaalua ai i aaoaga a le au perofeta faapea foi i aaoaga a lo tatou Alii le taua o tagata uma i le alofa ma le faaolataga a le Atua.

viii) O le faaolaina o le tagata mai le agasala ma le oti. O le ola faaleagaga o le tagata e mafai ona fai ma taiala e faaleleina ai ma faafouina ai lona ola faatino i aso uma. O le tumutumuga lea o le feau faaperofeta faapea foi aaoaga ma fetalaiga a lo tatou Alii. O le galuega lavea'i e amata mai i le Atua. A sa'o ma tonu le va feagai ai o le tagata ma le Atua, e le faafesiligia foi le manuia ma le sologa lelei o lona soifua faatino. O le galuega lavea'i lea ua tuuina mai e faaauauina e le Ekalesia ma ona tagata faatuatua.

Se iai se tama'i nuu e latalata i le matafaga oloo iai le moli o le ava e lapataia ai vaa laiti mai papa e ono afaina ai. I taimi o le leaga o le tau ma le pogisa e masani ona faalogoina ai e tagata o lea nuu le valaau fia ola mai o tagata mai vaa laiti ua afaina i ia papa.

Sa masani ona latou faia le galuega o le laveaiina o ia tagata mai le sousou o le sami faapea foi le malulu o le po. Ua manatu loa tagata o lea nuu e tatau ona fai se fale e latalata i le matafaga e faigofie ai ona lagona atu nisi oloo valaau mai mo se fesoasoani. Ua fausia le fale, ua iai moega, tipoti uila mo ipu ti, o le TV e matamata ai faapea ma mea uma lava ina ia mafanafana ma lelei i latou o le a tiute i lea po ma lea po. Peitai o le mea ua tupu, ua mafanafana ma comfortable tele i latou o e oloo tiute i totonu o le fale, ua matua faigata ai ona latou toe lagona atu le valaau mai fafo o i latou ua afatia ma fia ola ma fia maua se fesoasoani.

O le galuega lavea'i a le Atua ua tuuina mai ia te oe ma au le tino o Keriso i le lalolagi, o le Ekalesia lea ina ia faataunuuna i ona o'oo'oga uma, aua o le faailoga manino lena o le Ekalesia oloo moni ma faamaoni lana galuega lavea'i.

O E UA MALILIU

Sisalani Talimatasi

Matafeo

6 Me 1925 - 24 Iulai 2010



O Sisalani o ia o le faletua o le A'oa'o Fesoasoani. Na soifua mai i le aso 6 Me 1925, ae maliu i le aso 24 Iulai 2010. O ona matua o Tafao Talimatasi i Vailuutai ma Fatumeleni Talimatasi. Ua leva ona fa'ataotolia Salani mai le tele o gasegase na maua ai, ma ua le lava foi le malosi o si ona tino e tali atu ai i le malosi o mai, auā ua matua o ia; 85 ona

tausaga.

Na aumai i tua le tino maliu o Sisalani i le Aso Lulu 4 o Aokuso, i le itula e 2:00pm mo lona sauniga faa-le-aiga i le malumalu EFKS Apia-uta. Sa faia e le matou faletolu i Vaivase-uta le sauniga faa-le-aiga. Sa ou ta'ita'i, faitau Tusi Paia Enefatu Lesā FS, tatalo Apisaloma Taelipua Aiono FS, ae lauga Neru Tiatia FM. Na maea le sauniga ona molimoli lea o lona tino maliu i Vailuutai ma tofā ai, ma sauni ai mo ona toe sauniga i le aso e soso'o ai.

O toe sauniga sa ta'ita'ia e le Pulega Apia Sasa'e, sa ta'ita'i Kirisimasi Amosa FS, o le Tusi Paia sa faitauina e Moli Moli FS, o talosaga sa saunia e Elisaia Kolia FS, ao le lauga na saunia e KFE. Tu'uau. O molimau: o le tamā ia Matafeo Eteuati Matafeo, o Tagaloasa Uili Matafeo ma le molimau faa-le-agaga o Siolo S Tauati FT.

O Sisalani sa galue o se faia'oga a le malo. Ma te o mai i Apia-uta i

le 1985 ua malolo ritaea Salani, ae o lo'o malosi lava. O se faia'oga Aso Sa e fa'amaoni ma e saunia i ana mataupu; e fa'amaopoopo i le Au Talavou aemaise le Mafutaga a Tinā. O aso uma ou te asiasi ai i lenei aiga, e tataua lava ona ou foi ma se mea-alofa mai ia Salani, a le o se pulou laufala, o se ofu, o se solo, o fua o ana fa'aeleleaga, o se ula lole, ae ese ai lava se tupe. Ou te iloa fa'alavelave uma o le aiga o Salani i Vailuutai, i le molimoli atu o se fa'aaloalo mai lona aiga, auā o se tagata e amanaia e lona aiga lona leo. O se tinā e tausi faifeau e o'o lava i le fanau a le faifeau e pei lava o lana fanau. E manatua pea lenei tinā ma ona uiga fiafia ma le tusaafia. E leitioa le fatu pese Eperu, fai mai; "E manatua tagata amio-Atua," ulufale atu ia e fiafia ma lou Alii i lona maota.

Ia manuia lau malaga.
Saunia: Rev. Siolo S. Tauati FT
EFKS Apia-uta.

Matafeo Reupena Eteuati Matafeo (AF)

11 Mati 1922 - 13 Me 2011



Na soifua mai Matafeo i le aso 11 Mati 1922, ae maliu i le aso 13 Me 2011. O ona matua o Matafeo Reupena Matafeo o Asaga ma Lepupa Vaotuaa i Afega. Sa faaiipoipo atu o ia iā Sisalani Talimatasi i le aso 20 Tesema 1956. Na foaiina iā i laua se fanau e to'a ono, o le aofa'i o fanau a lana fanau e 20; ma fanau a fanau a lana fanau e to'a 9. Lona uiga e 35 le aofa'i o ē

na tutupu mai ia Matafeo.

E sili atu ma le tausaga le umi o le taimi sa faataotolia ai o ia i lona gasegase; ae o le masina o Iuni 2009, o le taimi mulimuli lea sa ta'ita'ia ai e Matafeo la matou sauniga lotu i le Aso Sa. O ona a'ao ua le atoatoa le malosi, ao lona siufofoga e malosi pea.

Na ave'ese mai le tino maliu o Matafeo mai le maota o Anauli Pofitu i le itula e 3:00pm o le aso 23 Me 2011, ma molimoli mai ai i le falesa EFKS Apia-uta mo ona sauniga faale-aiga. Sa ou ta'ita'ia le sauniga lea, o le faifeau Pule A'oga o Ieremia Leau na faitauina le Tusi Paia, o Enefatu Lesā FS na saunia talosaga, ao le Susuga ia Asi Tuisalega FM na saunia le lauga. Na maea le sauniga ona molimoli atu ai lea i Aleisa ma tofā ai.

O ona toe sauniga i le aso na soso'o ai, sa ou ta'ita'ia lava. Na

fa'aulufale e Moli Moli FS le tino maliu, sa faitauina e Paulo Koria FS le Tusi Paia, o talosaga sa saunia e le Faifeau Toeaina o Siveva Gogo ma le lauga na saunia e Fuifui Teevale FS.

O molimau: Tagaloasa Salā Uili Matafeo na fai ma sui o le fanau, o le afafine o le uso matua o Matafeo Eteuati ma Talimatasi mai Vailuutai na fai ma sui o le aiga. Na faaii i lau molimau i lona soifua faale-agaga.

O ona toe sauniga i le tuugamau, na ta'ita'ia lava e Siolo Tauati FT, ma faatofa atu ai i le pese a le au Kerisiano "Talofa uso, tōfāina oe." E faagalogata uiga o lenei tamā, auā o le galue a Matafeo i totonu o lona aiga, o ana mea fa'amatai i le nuu o Asaga, aemaise i totonu o le aulotu i Apia-uta, e manao lava e fai le mea e sili ona lelei. E naunau lava lenei
faaauau itulau e sosoo ai

O E UA MALILIU

Matafeo Reupena.....

tamā ia sili lana taulaga i tausaga uma, ia sili foi lona alofa i le faifeau. O se tamā e mamā lana talanoa, na te faaogaina le Gagana Samoa ma le faa-Peretania, ma e tu'u sao lava ana upu, ma ou te leiloa pe ita lea tagata pe leai.

Sa'iole Tupua Su'a Sasa R. Aputi II Neufeldt

1 Aokuso 1936 - 30 Oketopa 2011



Na soifua mai Sa'iole i le aso 1 Aokuso 1936, ae maliu i le aso 30 Oketopa 2011. E silafia e le to'atele lenei tinā i lona suafa o Iole, ai o le faapu'upu'uina lea o lona suafa Sa'iole. O ona matua, o Tupua Aiono Tupua ma Filifiliomalo Matiu Tupua.

Pe lua tausaga sa fa'ataotolia ai Iole i lona gasegase. Sa si'i ma'i foi i Niu Sila ma toe foi mai, ma fa'ataotolia ai i lona aiga, sei o'o ai lava i le taimi ua le lava ai si ona malosi e tali atu ai i tiga o le ma'i, ma malolo filemu atu ai lava lea. Na ave'esea mai le tino maliu o Iole mai le maota o Pau Sefo Pau i le itula e 8:00am o le aso 3 o Novema, a'o ona toe sauniga na faia i le itula e 11:00am o lona lava aso i le malumalu o le EFKS Apia-uta.

O le Susuga i le faifeau Pule A'oga o Ieremia Leautuli na ia ta'ita'ia le

O se tamā e mimita i lana fanau, auā e maualuluga lava tulaga o galuega o lo'o galulue ai, a fai ana tala, e toso lava i tua i le amataga mai o le la aiga i le maualalo ma le matitiva. O le a'oa'o o le pulela'a, e saunia i ona tofiga aemaise pe a ta'ita'i i se sauniga. E malolo mai lava i le pulela'a ona ua le gafatia e ona a'ao ona tu, ao le leo o le toeaina e le vaivai. Ao maua si o la malosi ma le tinā, e auai i mea e fai a le

sauniga, ma o ia foi na fa'aulufaleina le tino maliu i le falesa. O le Tusi Paia na fofogaina e le A'oa'o Malua Sikolasipi o Reupena Nofoaiga; o le tatalo na saunia e Faraimo Tiitii FS, ao le lauga na saunia e Esaroma Fatilua FS.

O ē na saunia molimau: o le Afioaga Matiu Moe Tupua; o Su'a Tulimasealii Ross Su'a (sui o le fanau) ma le molimau faale-agaga na saunia e le faletua Merita Tauati e fai ma sui o le faifeau Toeaina sa toesea i atunuu i fafo. Na faai'uina molimau i le pese a le fanau. O sauniga i luga o le tu'ugamau, na saunia lava e le ta'ita'i; ma fatofa atu ai ia Iole i le lagiina o le Pese "Talofa uso e, tofaina oe."

Na faaiipoipo Iole ia Su'a Richard Aputi II Neufeldt, ma foaiina ai ia i laua se fanau e to'a 10. O le aofa'i o fanau a le fanau e 41, ao fanau o fanau a le la fanau e 11. Lona uiga e maliu Iole ua 62'le aofa'i o tagata ua tupuga mai ia laua ma Su'a.

Pulega ma le Matagaluega. E faamaopoopo i le Au Talavou ma le A'oga Aso Sa. Ua faatolu ona tu'u iai le vaaiga o le galuega pe a ma malolo. Faafetai i le Atua ona o ana mea alofa sa faaogaina ma tausii lelei e lenei auaua. "Ioe, na foaiina mai e le Alii, ua aveeseina e le Alii, ia fa'amanūina le suafa o le Alii."

Ia manuia lau malaga uso.

Saunia: Siolo S. Tauati FT
EFKS Apia-uta

E atamai Iole e tausii lona aulelei, e maio lelei, e naunau i mea na te faia ia matagofie ma lelei. O le vaaiga ma le tausiga o lana fanau ma a latou fanau, e naunau Iole ia ola maloloina, ia popoto ma ia fiafia i mea lelei.

O se tinā sa faamaopoopo i mea e fai a le aulotu, e o'o lava i le Mafutaga a Tinā, o le aulotu. Ou te molimau atu, o le isi lea tinā na te faatauaina le taimi e tele lava ina muamua mai ma faatalitali i isi. O se tinā e tausii faifeau, ma o se aiga e fai taulaga ma tautua lotu. E tau le lagona se leo o Iole i fonotaga ma soalaupulega a le aulotu, ae vave tele lona faatinoga o se faaiuga ua tasi iai finagalo, ae faia ma le loto fiafia. Ia manuia lau malaga auā o lo'o faatali mai lou Matai ma lana upu: "Le auaua lelei e, ma le faamaoni, ulufale maia i le fiafia o lou Alii."

Siolo S. Tauati FT
EFKS Apia-uta

Ua foa'iina mai o ia e ia e fai mo'u sui

-- pese 156 --

E le ifoga la lenei
Ia Iesu le alofa mai;
E magalo lelei uma ai
Ai lo tatou nei moe mai.

Ia tatou 'apo atu nei
Ia Iesu le mamalu mai;
Aue! ta ofo, ta te te'i,
Ia ua ia saili mai.

Sa nofo mau i matou nei
I mea puapuaga;
Pe na fai e i'u lelei
La matou sala faigata.

Ua togi tasi e Iesu
I mea ua tatou tigaina ai;
Ua faailoa le filemu
I lona toto na sui mai.

O E UA MALILIU

Va Paleaae Ioane (Tina Matua)

18 Novema 1929 - 3 Novema 2011



Matua - Konelio Asiata -
Lotofaga Safata ma Talaia Leau i

Pitty Samau Lokeni

Faletua o le Tiakono



O se faletua sa galue malosi e
tautua i lana Ekalesia e ala i lona tofi

O fea e maua ai le fiafia

O se tala mai atunuu i sasae. Fai mai o se tupu sa pule i se isi malo tele ma le ta'uta'ua. Sa nofo le tupu i se maota matua manaia lava. O totonu o le maota sa teuteuina i oloa e faaali ai le tamaoiga o le tupu. Peitai, e ui lava ina nofo lenei tupu i lenei maota matagofie, tele ana auauna, tele lona tamaoiga, ae na te lei maua se fiafia.

Samata i Tai

Faaipoipo ia Paleaae Ioane o Saoluafata, Soifua mai ia Novema 18, 1929 ae maliu Novema 3, 2011.

Sa galulue ma Paleaae i le la tofi tiakono i tausaga e tele. Ina ua tuua le malo e le tiakono, sa galue pea lenei tinā ma tautua i le Ekalesia. E le gata i le la matafale lotu ao le mafutaga tinā. E galue fiafia tautua malosi foi i le Ekalesia ma mea fai.

Sa ia te ia le taleni o le fofo fanau laiti. E solo uma iai tinā ma a latou fanau pe a mama'i. E alofa, e fai fanau.

O ona toe sauniga na faia i le EFKS Saoluafata 15 Novema

tiakono. E molimauina lona soifua agamalu, loto alofa ma le faamaoni e le gata i le malo, a o le nuu ma le Ekalesia.

Sa faatumulia ona toe sauniga i le mamalu o le malo, faapea le Ekalesia ma le atunuu.

O le Susuga a le faifeau o Iakopo Pesaleli sa faaulufaleina mai le sa o le tina i le malumalu, ma saunia le molimau o lona soifua faa-Ekalesia. O le Susuga a le faifeau ia Tuafaiva Mose sa saunia talosaga, ma le Susuga a le A'oa'o Fesoasoani o Tufuga Faaitua na faitauina le Tusi

E popole lava ia ma le fiafia.

O se tasi o ana auauna, o se tagata o iai le tofa ma le atamai, ma lelei foi ana fautuaga e masani ona fai i le tupu pe a fesili ane ia ia. Na aami e le tupu le toeaina lenei ma fesili iai pe faapefea ona faate'a lona popole ma lona le maua o se fiafia. Ae na tali le tagata lenei, ia alu le tupu e moe i se isi po a o ia ofuna le ofutino o se tagata fiafia.

Ona taape ai loa lea o auauna a le tupu i lea itu ma lea itu o le malo, e saili mai se tagata fiafia e aumai lona ofutino e ofu ai le tupu. Toatele tagata fiafia na maua, ae tofu lava foi ia tagata ma se mea e le fiafia ai. Ona tau atu loa lea o le latou sailiga i se tagata mativa ma 'aisi o nofonofo mai i tafatafa o le ala.

2011. O au sa ta'ifa'i, aumai i totonu Peni Liva FS, Tatalo Sulu Malaga FS, Tusi Paia Anitoni Misa AM. Lauga Fili Sia Matalavea FS. Sa molimau Launiu Paleaae e fai ma sui o le fanau.

Sa usu foi le pese a le fanau e aualofa ai i lo latou tinā. Na fa'ai'u i lona oliolisaga tumau ma le pese faamavae a le Au Kerisiano.

Faamaise le Atua i fanau ma aiga.

Limuaa P. Samuelu Olo FS
EFKS Saoluafata.

Paia. O a'u sa saunia le upu faamafanafana e autu i le upu a Paulo ia 2 Timoteo 4:6,7. ".....ua lata ona po ou te alu ai. Ua ou tau le taua lelei ua iu ia te au le tausinioga, ua ou taofi i le upu o le faatuatua".

Ona faaii lea i lona oliolisaga tumau i lona aiga i Papaigalagala i Fagalii.

Ia saga faamafanafanaina pea e lona Agaga le Susuga i le Tama ma le nofoaalo, ma le aiga faanoanoa.

Iupeli Simanu FS
EFKS Fagalii

"O oe o se tagata fiafia?"

"Oi, tama, leai ma se mea ou te popole ai i lo'u olaga. O lo'u matua fiafia lava i le mea lea ou te iai." Faamatala atu loa i le tagata lea le manao o le tupu. Ma o lea ua o mai ma se tupe tele e faatau ai le ofutino o se tagata fiafia, se'i moe ai ma ia maua ai le fiafia. Ma o le mea lea o le a latou faatauina ai le ofutino o le tagata lea.

Ae 'ata 'e'e le ula leaga lea ma taavalevale ma fai atu, "A faapefea nei ona faataunuu le mana'o o le tupu o lea e leai so'u ofutino. Ou te manao i le tupe, a o le faalavelave, e leai se ofutino o le tama." Ma 'ata 'e'e lava le tagata 'aisi i le sailiga ofutino a auauna i le vaega o le aai e tumu ai tagata matitiva e le 'o'ofu.